

四庫全書

集部

欽定四庫全書

集部

石倉歷代詩選卷三十八

詳校官庶吉士臣范逢恩

侍讀臣孫球覆勘

總校官進士臣朱鈐

校對官編修臣盛傳崇

謄錄監生臣史復瑄

欽定四庫全書

石倉歷代詩選卷三十八

明 曹學佺 編

盛唐七

高適

字達夫
渤海人

銅雀妓

日暮銅雀迴秋深
玉座清蕭森松柏
望委鬱綺羅情君
恩不再得妾舞為誰輕

塞上

東出盧龍塞浩然客思孤亭堠列萬里漢兵猶備胡邊
塵滿北溟虜騎正南驅轉鬪豈長策和親非遠圖惟昔
李將軍按節臨此都總戎掃大漠一戰擒單于常懷感
激心願効縱橫謨倚劍欲誰語闕河空鬱紆

薊門行

幽州多騎射結髮重橫行一朝事將軍出入有聲名紛
紛獵秋草相向角弓鳴

單父逢鄧司倉覆倉庫因而有贈

邦牧今坐嘯羣賢趨紀綱
四人忽不擾耕者遙相望
粲府中妙授詞如履霜
炎炎伏熱時草木無晶光
匹馬度睢水清風何激揚
校緡閱帑藏發廩欣斯箱
邂逅得相逢歡言至夕陽
開襟自公餘載酒登琴堂
舉杯挹山川寓目窮毫芒
白鳥向田盡青蟬歸路長
醉中不惜別况乃正遊梁

薊門不遇王之渙郭密之因以留贈

適遠登薊丘茲晨獨掩眉賢交不可見吾願終難說迨
遞千里遊羈離十年別才華仰清興功業嗟芳節曠蕩
阻雲海蕭條帶風雪逢時事多謬失路心彌折行矣勿
重陳懷君但愁絕

寄孟五少府

秋氣落窮巷離憂兼暮蟬後時已如此高興亦徒然知
君念淹泊憶我屢周旋征路見來鴈歸人悲遠天平生
感千里相望在貞堅

和崔二少府登楚丘城作

故人亦不遇異縣久棲託辛勤失路意感嘆登樓作清
晨眺原野獨立窮寥廓雲散芒碭山水還睢陽郭遶梁
即襟帶封衛多漂泊事古悲城池年豐愛墟落相逢俱
未展攜手空蕭索何意千里心仍求百金諾公侯皆我
輩動用在謀畧聖心思賢才竭來刈葵藿

酬陸少府

朝臨淇水岸還望衛人邑別意在山阿征途背原隰蕭

蕭前村口惟見轉蓬入水渚人去遲霜天鴈飛急固應
不遠別所與路未及欲濟川上舟相思空佇立

酬裴員外以詩代書

少時方浩蕩遇物猶塵埃脫畧身外事交遊天下才單
車入燕趙獨立心悠哉寧知戎馬間忽展平生懷且欣
清論高豈顧夕陽頽題詩碣石館縱酒燕王臺北望沙
漠垂漫天雪皚皚臨邊無策畧覽古空徘徊樂毅我所
憐拔齊翻見猜荆卿吾所悲適秦不復迴然諾多死地

公忠成禍胎與君從此醉每恐流年催如何俱老大始
復忘形骸兄弟真二陸聲名連八裴乙未將星變賊臣
候天災胡騎犯龍山乘輿經馬嵬千官無倚著萬姓徒
悲哀誅呂鬼神動安劉天地開奔波走風塵倏忽值雲
雷擁旄出淮甸入幕徵楚材誓當剪鯨鯢永以竭駑駘

酬龐十兵曹

憶昔遊京華自言生羽翼懷書訪知己末路空相識許
國不成名還家有慙色託身從畝畝浪跡初自得雨澤

感天時耕耘忘帝力同人洛陽至問我睢水北遂爾歎
津涯淨然見胸臆高談懸物象逸韻投翰墨別岸迴無
垠海鶴鳴不息梁城多古意攜手共悽惻懷賢想鄒枚
登高思荆棘世情惡疵賤之子憐孤直酬贈感并深離
憂豈終極

同呂員外酬田著作幕門軍西宿盤山秋夜作

磧路天早秋邊城夜應永遙傳戎旅作已報關山冷上
將頓盤坂諸軍徧泉井綢繆閩外書慷慨幕中請能使

勲業高動令氛霧屏遠途能自致短步終難騁羽翮時
一看窮愁始三省人生感然諾何啻若形影白髮知苦
心陽春見佳境星河連塞絡刁斗兼山靜憶君霜露時
使我空引領

淇上酬薛三據兼寄郭少府微

自從別京華我心乃蕭索十年守章句萬事空寥落北
上登薊門茫茫見沙漠倚劍對風塵慨然思衛霍拂衣
去燕趙驅馬悵不樂天長滄洲路日暮邯鄲郭酒肆或

淹留漁潭屢棲泊
獨行備艱險所見窮善惡
永願拯芻蕘孰云干鼎鑊
皇情念淳古時俗何浮薄
理道資任賢安人在求瘼
故交負靈竒逸氣抱謇諤
隱軫經濟具縱橫建安作才望
忽先鳴風期無宿諾飄風勞州縣
迫遽限言謔東馳眇貝丘
西顧彌號畧淇水徒自流
浮雲不堪託吾謀適可用
天路豈寥廓不然買山田
一身與耕鑿且欲同鷦鷯
馬能志鴻鵠

酬岑二十主簿秋夜見贈之作

舍下蛩亂鳴居然自蕭索緬懷高秋興忽枉清夜作感
物我心勞涼風驚二毛池空菡萏死月出梧桐高如何
異鄉縣復得交才彥汨沒嗟後時蹉跎恥相見箕山別
來久魏闕誰不戀獨有江海心悠悠未嘗倦

宋中別李八

歲晏誰不歸君歸意可說將趨倚門望還念同人別駐
馬臨長亭飄然事明發蒼茫眺千里正值苦寒節舊國
多轉蓬平臺下明月世情薄疵賤夫子懷賢哲行矣各

勉旃吾當挹餘烈

贈別王十七管記

故交吾未測薄宦空年歲晚節蹤曩賢雄詞冠當世堂
中皆食客門外多酒債產業曾未言衣裘與人敝飄飄
戎幕下出入關山際轉戰輕壯心立談有邊計雲沙自
迴合天海空迢遞星高漢將驕月盛胡兵銳沙深冷陁
斷雪暗遼陽閉亦謂掃欃槍旋驚陷蜂蠆歸旌告東掠
闡騎傳西敗遙飛絕漢書已築長安第畫龍俱在葉寵

鶴先居衛勿辭部曲勲不藉將軍勢相逢季冬月悵望
窮海裔折劍留贈人嚴裝遂云邁我行將悠紆及此還
羈滯曾非濟代謀且有臨深誠隨波混清濁與物同醜
麗眇憶青巖棲寧忘褐衣拜自言愛水石本欲親蘭蕙
何意薄松筠翻然重管蒯恒深取與分孰慢平生契歎
曲鷄黍期酸辛別離袂逢時愧名節遇坎悲渝替適趙
非解紛遊燕往無說浩歌方振蕩逸翮思凌勵倏若異
鵬搏吾當學蟬蛻

連上別王秀才

飄飄經遠道客思滿窮秋
浩蕩對長連君行殊未休
崎嶇山海側想像無前儔
何意照乘珠忽然欲暗投
東路方蕭條楚歌復悲愁
暮帆使人感去鳥兼離憂
行矣當自愛壯年莫悠悠
余亦從此辭異鄉難久留
贈言豈終極慎勿滯滄洲

贈別沈四逸人

沈侯未可測其况信浮沈
十載常獨坐幾人知此心
乘

舟蹈滄海買劍投黃金世務不足煩有田西山岑我來
遇知己遂得開清襟何意閩閩間沛然江海深疾風掃
秋樹濮上多鳴砧耿耿尊酒前聯鴈飛愁音平生重離
別感激對孤琴

送韓九

惆悵別離日徘徊岐路前歸人望獨樹匹馬隨秋蟬常
與天下士許君兄弟賢良時正可用行矣莫徒然

送崔錄事赴宣城

大國非不理小官皆用才
欲行宣城印佳飲洛陽杯
晚景為人別長天無鳥迴
舉帆風波渺倚棹江山來
羨爾魚乘興蕪湖千里開

別張少府

歸客留不住朝雲縱復橫
馬頭向春草斗柄臨高城
嗟我久離別羨君看弟兄
歸心更難道回首一傷情

宴韋司戶山亭院

人幽想靈山意愜憐遠水習靜務為適
所居還復爾汲

流漲華池開酌宴君子苔逕試窺踐石屏可攀倚入門
見中峯攜手如萬里橫琴了無事垂釣應有以高館何
沈沈颯然涼風起

登廣陵樓靈寺塔

淮南富登樓茲塔信奇最直上造雲族憑虛納天籟迴
然碧海西獨立飛鳥外始知高興盡適與賞心會連山
黯吳門喬木吞楚塞城池滿牕下物象歸掌內遠思駐
江帆暮時結春靄軒車疑蠢動造化資大塊何必了無

身然後知所退

登百丈峰

朝登百丈峰遙望燕支道漢壘青冥間胡天白如掃憶
昔霍將軍連年此征討匈奴終不滅寒山徒草草惟見
鴻鴈飛令人傷懷抱

同羣公題鄭少府田家

鄭侯應悽惶五十頭盡白昔為南昌尉今作東郡客與
語多遠情論心知所益秋林既清曠窮巷空淅瀝蝶舞

園更閒雞鳴日云夕男兒未稱意其道固無適勸君且
杜門勿歎人事隔

同羣公題中山寺

平原十里外稍稍雲巖深遂及清淨所都無人世心名
僧既禮謁高閣復登臨石壁倚松徑山田多粟林超遙
盡巘踳逼側仍嶮嶽吾欲休世事於焉聊自任

同韓四薛三東亭翫月

遠遊悵不樂茲賞吾道存歎曲故人意辛勤清夜言東

亭何寥寥佳境無朝昏塔墀近洲渚戶牖當郊原矧乃
窮周旋游時怡討論樹陰蕩瑤瑟月氣延清樽明河帶
飛鴈野火連荒村對此更愁子悠哉懷故園

同敬八盧五汎河間清河

清川在城下沿汎多所宜同濟愜數公翫物欣良時飄
颿波上興燕婉舟中詞昔陟乃平原今來忽漣漪東流
達滄海西流延滹池雲樹共晦明井邑相逶迤稍隨歸
月帆若與沙鷗期漁父更留我前潭水木滋

漣上題樊氏水亭

漣上非所趣，偶為世務牽。
經時駐歸棹，日夕對平川。
莫論行子愁，且得主人賢。
亭上酒初熟，厨中魚每鮮。
自說宦遊來，因之居住偏。
煮鹽滄海曲，種稻長淮邊。
四時常晏如，百口無饑年。
菱芋藩籬下，漁樵耳目前。
異縣少朋從，我行復迭遭。
向不逢此君，孤舟已言旋。
明日又分首，風濤還眇然。

同呂判官從哥舒大夫破洪濟城迴登積石軍

多福七級浮圖

塞口連濁河，轅門對山寺。寧知鞍馬上，獨有登臨事。七
級凌太清，千崖列蒼翠。飄飄方寓目，想像見深意。高興
殊未平，涼風颯然至。拔城陣雲合，轉旆胡星墜。大將何
英靈，官軍動天地。君懷生羽翼，本欲厚騏驎。款段苦不
前，青冥信難致。一歌陽春後，三歎終自愧。

宋中十首

梁王昔全盛，賓客復多才。悠悠一千年，陳跡唯高臺。寂

寞向秋草悲風千里來

朝臨孟諸上忽見芒碭間赤帝終已矣白雲長不還時
清更何有禾黍徧空山

景公德何廣臨變莫能欺三請皆不忍妖星終自移君
心本如此天道豈無知

梁苑白日暮梁山秋草時君王不可見脩竹令人悲九
月桑葉盡寒風鳴樹枝

登高臨舊國懷古對窮秋落日鴻鴈度寒城砧杵愁昔

賢不復有行矣莫淹留

出門望終古獨立悲且歌憶昔魯仲尼悽悽此經過衆人不可向伐樹將如何

逍遙漆園吏冥沒不知年世事浮雲外閒居大道邊古來同一馬今我亦忘筌

五霸遞征伐宋人無戰功解圍幸竒說易子傷吾衷唯見廬門外蕭條多轉蓬

常愛宓子賤鳴琴能自親邑中靜無事豈不由其身何

意千年後寂寞無此人

關伯去已久高丘臨道傍人皆有兄弟爾獨為參商終
古猶如此而今安可量

薊中作

策馬自沙漠長驅登塞垣邊城何蕭條白日黃雲昏一
到征戰處每愁胡虜翻豈無安邊書諸將已承恩惆悵
孫吳事歸來獨閉門

自淇涉黃河途中

清晨泛中流羽旆滿汀渚黃鸝何處來
昂藏寡儔侶飛鳴無人見飲啄豈得所
雲漢爾固知胡為不輕舉

野人頭盡白與我忽相訪手持青竹竿
日暮淇水上雖老美容色雖貧亦閒放
釣魚三十年中心無所向

南登滑臺上却望河淇間竹樹夾流水
孤城對遠山念茲川路濶羨爾沙鷗閑
長想別離處猶無音信還

東入黃河水茫茫汎紆直北望太行山
峨峨半天色山河相映帶深淺未可測
自昔有賢才相逢不相識

秋日登滑臺臺高秋已暮獨行既未愜懷土悵無趣晉
宋何蕭條羌胡散馳驚當時無戰畧此地即邊戍兵革
徒自勤山河孰云固乘閒喜臨眺感物傷遊寓惆悵落
日前飄飄遠帆處北風吹萬里南鴈不知數歸意方浩
然雲沙更迴互

茲川方悠邈雲沙無前後古堰對河孺長林出淇口獨
行非吾意東向日已久憂來誰得知且酌樽中酒

朝從北岼來泊船南河澍試共野人言深覺農夫苦去

秋雖薄熟今夏猶未雨耕耘日勤勞租稅兼馮鹵園蔬
空寥落產業不足數尚有獻芹心無因見明主

我行倦風湍輟棹將問津空傳歌瓠子感慨獨愁人孟
夏桑葉肥穰陰夾長津蠶農有時節田野無閒人臨水
狎漁樵望山懷隱淪誰能去京洛顯穎對風塵

宋中遇陳二

常忝鮑叔義所期王佐才如何守苦節獨此無良媒離
別十年外飄飄千里來安知罷官後惟見柴門開窮巷

隱東郭高堂詠南陔籬根長花草井上生莓苔伊昔望
霄漢于今倦蒿萊男兒命未達且進手中杯

魯郡途中遇徐十八錄事

誰謂嵩穎客遂經鄒魯鄉前臨少昊墟始覺東蒙長獨
行豈吾心懷古激中腸聖人久已矣游夏遙相望徘徊
野澤間左右多悲傷日出見闕里川平知汶陽弱冠負
高節十年思自強終然不得意去去任行藏

魯西至東平

沙岸泊不定石橋水橫流問津見魯俗懷古傷家丘寥
落千載後空傳褒聖侯

東平路作三首

南圖適不就東走豈吾心索索涼風動行行秋水深蟬
鳴木葉落茲夕更愁霖

明時好畫策動欲干王公今日無成事依依親老農扁
舟向何處吾愛汶陽中

清曠涼夜月徘徊孤客舟渺然風波上獨愛前山秋秋

至復搖落空令行者愁

登隴

隴頭遠行客隴上分流水
流水無盡期行人未云已
淺才登一命孤劍通萬里
豈不思故鄉從來感知已

苦雪四首

二月猶北風天陰雪冥冥
寥落一室中悵然慙百齡
苦愁正如此門柳復青青

惠連發清興袁安念高卧
余故非斯人為性兼懶惰
賴

茲樽中酒終日聊自過

濛濛灑平陸浙滙至幽居且喜潤羣物馬能悲斗儲故
交久不見烏雀投吾廬

孰云久閒曠本自保知寡窮巷獨無成春條祇盈把安
能羨鵬舉且欲歌牛下乃知古時人亦有如我者

哭單父梁九少府

開篋淚沾臆見君前日書夜臺今寂寞猶是子雲居疇
昔探靈竒登臨富山水同舟南浦下望月西江裏契濶

多別離綢繆到生死九原即何處萬事皆如此晉山徒
嗟峨斯人已冥冥常時祿且薄歿後家復貧妻子在遠
道弟兄無一人十上多苦辛一官常自哂青雲將可致
白日忽先盡唯有身後名空留無遠近

行路難

君不見富家翁舊時貧賤誰比數一朝金多結豪貴百
事勝人健如虎子孫成行滿眼前妻能管絃妾歌舞自
矜一身忽如此却笑傍人獨愁苦東鄰少年安所如席

門窮巷出無車有才不肯學干謁何用年年空讀書

古大梁行

古城莽蒼饒荆榛驅馬荒城愁殺人魏王宮觀盡禾黍
信陵賓客隨灰塵憶昨雄都舊朝市軒車照耀歌鐘起
軍容帶甲三十萬國步連營一千里全盛須臾那可論
高臺曲池無復存遺墟但有狐狸迹古地空餘草木根
暮天搖落傷懷抱撫劍悲歌對秋草俠客猶傳朱亥名
行人尚識夷門道白壁黃金萬戶侯寶刀駿馬填山丘

年代淒涼不可問往來唯見水東流

邯鄲少年行

邯鄲城南游俠子自矜生長邯鄲裏千場縱博家仍富
幾處報讐身不死宅中歌笑日紛紛門外車馬常如雲
未知肝膽向誰是令人却憶平原君君不見今人交態
薄黃金用盡還疎索以茲感歎辭舊遊更於時事無所
求且與少年飲美酒往來射獵西山頭

燕歌行

漢家煙塵在東北漢將辭家破殘賊男兒本自重橫行
天子非常賜顏色撻金伐鼓下榆關旌旆逶迤碣石間
校尉羽書飛瀚海單于獵火照狼山山川蕭條極邊土
胡騎憑陵雜風雨戰士軍前半死生美人帳下猶歌舞
大漠窮秋塞草腓孤城落日鬪兵稀身當恩遇常輕敵
力盡關山未解圍鐵衣遠戍辛勤久玉筋應啼別離後
少婦城南欲斷腸征人薊北空回首邊庭飄颻那可度
絕域蒼茫無所有殺氣三時作陣雲寒聲一夜傳刁斗

相看白刃血紛紛死節從來豈顧勲君不見沙場征戰
苦至今猶憶李將軍

古歌行

君不見漢家三葉從代至高皇舊臣多富貴天子垂衣
方晏如廟堂拱手無餘議蒼生偃卧休征戰露臺百金
以為費田舍老翁不出門洛陽少年莫論事

人日寄杜二拾遺

人日題詩寄草堂遙憐故人思故鄉柳條弄色不忍見

梅花滿枝空斷腸身在遠藩無所預心懷百憂復千慮
今年人日空相憶明年人日知何處一卧東山三十春
豈知書劍與風塵龍鍾還黍二千石愧爾東西南北人

九日酬顏少府

簷前白日應可惜籬下黃花為誰有行子迎霜未授衣
主人得錢始沽酒蘇秦顛顛人多厭蔡澤棲遲世看醜
縱使登高只斷腸不如獨坐空搔首

留別鄭三韋九兼洛下諸公

憶昔相逢論久要，顧君哂我輕常調。羈旅雖同白社遊，
詩書已作青雲料。蹇質蹉跎竟不成，年過四十尚躬耕。
長歌達者杯中物，大笑前人身後名。幸逢明盛多招隱，
高山大澤徵求盡。此時亦得辭漁樵，青袍裹身荷聖朝。
犁牛釣竿不復見，縣人邑吏來相邀。遠路鳴蟬秋興發，
華堂美酒離憂銷。不知何日更攜手，應念茲晨去折腰。

送揚山人歸嵩陽

不到嵩陽動十年，舊時心事已徒然。一二故人不復見，

三十六峯猶眼前
夷門二月柳條色
流鶯數聲淚沾臆
鑿井耕田不我招
知君以此忘帝力
山人好去嵩陽路
惟余眷眷長相憶

送別

昨夜離心正鬱陶
三更白露西風高
螢飛木落何淅瀝
此時夢見西歸客
曙鐘寒亮三四聲
東隣嘶馬使人驚
攬衣出戶一相送
唯見歸雲縱復橫

贈別晉三處士

有人家住清河源渡河問我遊梁園手持道經注已畢
心知內篇口不言盧門十年見秋草此心惆悵誰能道
知己從來不易知慕君為人與君好別時九月桑葉疎
出門千里無行車愛君且欲君先達今上求賢早上書

送渾將軍出塞

將軍族貴兵且強漢家已是渾邪王子孫相承在朝野
至今部曲燕支下控弦盡用陰山兒登陣長騎大宛馬
銀鞍玉勒繡螭弧每逐嫖姚破骨都李廣從來先將士

衛青未肯學孫吳傳有沙場千萬騎昨日邊庭羽書至
城頭畫角三四聲匣裏寶刀晝夜鳴意氣能甘萬里去
辛勤動作一年行黃雲白草無前後朝建旌旄夕刁斗
塞下應多俠少年關西不見春楊柳從軍借問所從誰
擊劍酣歌當此時遠別無輕繞朝策平戎早寄仲宣詩

封丘作

我本漁樵孟諸野一生自是悠悠者乍可狂歌草澤中
寧堪作吏風塵下祇言小邑無所為公門百事皆有期

拜迎官長心欲碎，鞭撻黎庶令人悲。
歸來向家問妻子，舉家盡笑今如此。
此生事應須南畝，田世情付與東流水。
夢想舊山安在哉，為銜君命日遲迴。
乃知梅福徒為爾，轉憶陶潛歸去來。

題李別駕壁

去鄉不遠逢知己，握手相歡得如此。
禮樂遙傳魯伯禽，賓客爭過魏公子。
酒筵暮散明月上，櫪馬長鳴春風起。
一生稱意能幾人，今日從君問終始。

寄宿田家

田家老翁住東陂，說道平生隱在茲。
鬢白未曾記日月，山青每到識春時。
門前種柳深成巷，野谷流泉添入池。
牛壯日耕十畝地，人閒常掃一茅茨。
客來備酌清樽酒，感興平吟才子詩。
巖際窟中藏鼯鼠，潭邊竹裏隱鷓鴣。
村墟日落行人少，醉後無心怯路歧。
今夜只應還寄宿，明朝拂曙與君辭。

別韋參軍

二十解書劍西遊長安城舉頭望君門屈指取公卿國
風冲融邁三五朝庭歡樂彌寰宇白璧皆言賜近臣布
衣不得干明主歸來洛陽無負郭東過梁宋非吾土免
苑為農歲不登鴈池垂釣心長苦世人向我同衆人唯
君於我最相親且喜百年有交態未嘗一日辭家貧彈
棊擊筑白日晚縱酒高歌揚柳春歡娛未盡分散去使
我惆悵驚心神丈夫不作兒女別臨歧涕淚沾衣巾

送田少府貶蒼梧

沈吟對遷客惆悵西南天昔為一官未得意今向萬里
令人憐念茲斗酒成睽間停舟歎君日將晏遠樹應憐
北地春行人却羨南歸鴈丈夫窮達未可知看君不合
長數竒江山到處堪乘興楊柳青青那足悲

平臺夜遇李景參有別

離心忽悵然策馬對秋天孟諸薄暮涼風起歸客相逢
渡睢水昨時攜手已十年今日分途各千里歲物蕭條
滿路歧此行浩蕩令人悲家貧羨爾有微祿欲往從之

何所為

賦得還山吟送沈四山人

還山吟天高日暮寒山深送君還山識君心人生老大
須恣意看君解作一生事山間偃仰無不至石泉淙淙
若風雨桂花松子常滿地賣藥囊中應有錢還山服藥
又長年白雲勸盡杯中物明月相隨何處眠眠時憶問
醒時事夢魂可以相周旋

崔司錄宅燕大理李卿

多雨殊未已秋雲更沈沈洛陽故人初解印山東小吏
來相尋上卿才大名不朽早朝至尊暮求友豁達常推
海內賢殷勤但酌樽中酒飲醉欲言歸剡谿門前駟馬
光照衣路傍觀者徒唧唧我公不以為是非

同鮮于洛陽於畢員外宅觀畫馬歌

知君愛鳴琴仍好千里馬永日恒思單父中有時心到
宛城下遇客丹青天下才白生胡雛控龍媒主人娛賓
畫障開只言騏驎西極來半壁趨趨勢不住滿堂風飄

颯然度家僮愕視欲先鞭
捩馬驚嘶還屢顧始知物妙
皆可憐燕昭市駿豈徒然
縱令剪拂無所用猶勝駑駘
在眼前

部落曲

蕃軍傍塞遊代馬噴風秋
老將垂金甲閱文著錦裘
瑯
戈蒙豹尾紅旆插狼頭
日暮天山下鳴笳漢使愁

贈杜二拾遺

傳道招提客詩書自討論
佛香時入院僧飯屢過門
聽

法還應難尋經剩欲翻草玄今已畢此外復何言

醉後贈張九旭

世上謾相識此翁殊不然興來書自聖醉後語尤顛白
髮老閒事青雲在目前牀頭一壺酒能更幾回眠

途中寄徐錄事

落日風雨至秋天鴻鴈初離憂不堪比旅館復何如君
又幾時去我知音信疎空多篋中贈長見右軍書

酬衛八雪中見寄

季冬憶淇上落日歸山樊舊宅帶流水平田臨古村雪
中望來信醉裏開衡門果得希代寶緘之那可論

送白少府送兵之隴右

殘更登隴首遠別指臨洮為問關山事何如州縣勞軍
容隨赤羽樹色引青袍誰斷單于臂今年太白高

別韋五

徒然酌杯酒不覺散人愁相識仍遠別欲歸翻旅遊夏
雲滿郊甸明月照河洲莫恨征途遠東看漳水流

別劉大校書

昔日京華去知君才望新
猶作賦好莫嘆在官貧
且復傷遠別不然愁此身
清風幾萬里江上一歸人

宋中別司功叔各賦一物得商丘

商丘試一望隱隱帶秋天
地與星辰在城將大路遷
干戈悲昔事墟落對窮年
即此傷離緒悽悽賦酒筵

獨孤判官部送兵

餞君嗟遠別為客念周旋
征路今如此前軍猶眇然
出

關逢漢壁登隴望胡天亦是封侯地期君早著鞭

別從甥萬盈

諸生曰萬盈四十乃知名宅相予偏重家丘人莫輕美
才應自料苦節豈無成莫以山田薄今春又不耕

別崔少府

知君少得意汶上掩柴扉寒食仍留火春風未授衣皆
言黃綬屈早向青雲飛借問他鄉事今年歸不歸

別馮判官

碣石遼西地漁陽薊北天關山唯一道雨雪盡三邊才
子方為客將軍正渴賢遙知幕府下書記日翩翩

廣陵別鄭處士

落日知分手春風莫斷腸興來無不愜才在亦何傷
谿水堪垂釣江田耐插秧人生只為此亦足傲羲皇

別孫訢

離人去復留白馬黑貂裘屈指論前事停鞭惜舊遊
帝鄉那可忘旅館日堪愁誰念無知己年年睢水流

送劉評事克朔方判官賦得征馬嘶

征馬向邊州蕭蕭嘶不休
思深應帶別聲斷為兼秋
歧路風將遠關山月共愁
贈君從此去何日大刀頭

送魏八

更沽淇上酒還泛驛前舟
為惜故人去復憐嘶馬愁
雲山行處合風雨興中秋
此路無知己明珠莫暗投

送鄭侍御謫閩中

謫去君無恨閩中我舊過
大都秋鴈少只是夜猿多
東

路雲山合南天瘴癘和自當逢雨露行矣慎風波

送李侍御赴安西

行子對飛蓬金鞭指鐵驄功名萬里外心事一杯中虜
障燕支北秦城太白東離魂莫惆悵看取寶刀雄

送裴別將之安西

絕域眇難躋悠然信馬蹄風塵輕跋涉搖落怨睽攜地
出流沙外天長甲子酉少年無不可行矣莫悽悽

同李太守北池泛舟宴高平鄭太守

每揖龔黃事還陪李郭舟雲從四岳起水向百城流幽
意隨登陟嘉言即獻酬乃知縫掖貴今日對諸侯

同羣公登濮陽聖佛寺閣

落日登臨處悠然意不窮佛因初地識人覺四天空來
鴈清霜後孤帆遠樹中徘徊傷寓目蕭索對寒風

同衛八題陸少府書齋

知君薄州縣好靜無冬春散帙至棲鳥明燈留故人深
房臘酒熟高院梅花新若是周旋地當令風義親

八昌松東界山行

鳥道幾登頓馬蹄無暫閒崎嶇出長坂合沓猶前山石
激水流處天寒松色間王程應未盡且莫顧刀環

使青夷軍入居庸二首

古鎮青山口寒風落日時巖巖鳥不過冰雪馬堪遲出
塞應無策還家賴有期東山足松桂歸去結茅茨
登頓驅征騎棲遲愧寶刀遠行今若此微祿果徒勞絕
坂水連下羣峰雲共高自堪成白首何事一青袍

自薊北歸

驅馬薊門北北風邊馬哀蒼茫遠山口豁達胡天開五
將已深入前軍止半迴誰憐不得意長劍獨歸來

東平別前衛縣李家少府

黃鳥翩翩楊柳垂春風送客使人悲怨別自驚千里外
論交却憶十年時雲開汶水孤帆遠路繞梁山匹馬遲
此地從來可乘興留君不住益淒其

夜別韋司士

高館張燈酒復清
夜鐘殘月鴈歸聲
只言啼鳥堪求侶
無那春風欲送行
黃河曲裏沙為岸
白馬津邊柳向城
莫怨他鄉暫離別
知君到處有逢迎

送李少府貶峽中王少府貶長沙

嗟君此別意何如
駐馬銜杯問謫居
巫峽啼猿數行淚
衡陽歸鴈幾封書
青楓江上秋天遠
白帝城邊古木疎
聖代即今多雨露
暫時分手莫躊躇

同陳留崔司戶早春宴蓮池

同官載酒出郊圻晴日東馳鴈北飛隔岸春雲邀翰墨
傍簷垂柳報芳菲池邊轉覺虛無盡臺上偏宜酌酹歸
州縣徒勞那可度後時連騎莫相違

重陽

節物驚心兩鬢華東籬空繞未開花百年將半任三巳
五畝就荒天一涯豈有白衣來剝啄一從烏帽自欹斜
真成獨坐空搔首門柳蕭蕭噪暮鴉

送柴司戶克劉卿判官之嶺外

嶺外資雄鎮朝端寵節旄月卿臨幕府星使出詞曹海
對羊城濶山連象郡高風霜驅瘴癘忠信涉波濤別恨
隨流水交情脫寶刀有才無不適行矣莫徒勞

秦中送李九赴越

攜手望千里于今將十年如何每離別心事復迤邐適
越雖有以出關終耿耿愁霖不可向長路或難前吳會
獨行客山陰秋夜船謝家徵故事禹穴訪遺編鏡水君
所憶萼羹余舊便歸來莫忘此兼示濟江篇

陪竇侍御泛靈雲池

白露時先降清川思不窮
江湖仍塞上舟楫在軍中
舞
換臨津樹歌饒向晚風
夕陽連積水邊色滿秋空
乘興
宜投轄邀歡莫避驄
誰憐持弱羽猶欲伴鷓鴣

秋日作

端居值秋節此日更愁辛
寂寞無一事蒿萊通四鄰
閉
門生白髮回首憶青春
歲月不相待交游隨衆人
雲霄
何處託愚直有誰親
舉酒聊自勸窮通信爾身

赴彭州山行之作

峭壁連崆峒攢峯疊翠微鳥聲堪駐馬林色可忘饑怪
石時侵徑輕蘿乍拂衣路長愁作客年老更思歸且悅
巖巖勝寧嗟意緒違山行應未盡誰與玩芳菲

詠史

尚有綈袍贈應憐范叔寒不知天下士猶作布衣看

田家春望

出門何所見春色滿平蕪可歎無知己高陽一酒徒

營州歌

營州少年厭原野
狐裘蒙茸獵城下
虜酒千鍾不醉人
胡兒十歲能騎馬

和王七玉門關聽吹笛

胡人吹笛戍樓間
樓上蕭條海月閒
借問落梅凡幾曲
從風一夜滿關山

送李少府時在客舍作

相逢旅館意多違
暮雪初晴候鴈飛
主人酒盡君未醉

薄暮途遙歸不歸

聽張立本女吟

危冠廣袖楚宮妝
獨步閒庭逐夜涼
自把玉釵敲砌竹
清歌一曲月如霜

除夜作

旅館寒燈獨不眠
客心何事轉悽然
故鄉今夜思千里
愁鬢明朝又一年

石倉歷代詩選卷三十八

欽定四庫全書

石倉歷代詩選卷三十九

明 曹學佺 編

盛唐八

崔顥

汴州人

古遊俠呈軍中諸將

少年負膽氣好勇復知機
仗劍出門去孤城逢合圍
殺人遼水上走馬漁陽歸
錯落金鑱甲蒙茸貂鼠衣
還家

行且獵弓矢速如飛地迥鷹犬疾草深狐兔肥腰間帶
兩綬轉盼生光輝顧謂今日戰何如隨建威

贈輕車

悠悠遠行歸經春涉長道幽冀桑始青洛陽蠶欲老憶
昨戎馬地別時心草草烽火從北來邊城閉常早平生
少相遇未得展懷抱今日杯酒間見君交情好

贈王威古

三十羽林將出身常事邊春風吹淺草獵騎何翩翩挿

羽兩相顧鳴弓新上弦射麋入深谷飲馬投荒泉馬上
共傾酒野中聊割鮮相看未及飲雜虜寇幽燕烽火去
不息胡塵高際天長驅救東北戰解城亦全報國行赴
難古來皆共然

贈懷一上人

法師東南秀世實豪家子削髮十二年誦經峨眉裏自
此照羣蒙卓然為道雄觀生盡入妄悟有皆成空淨體
無衆染苦心歸妙宗一朝勅書至召入承明宮說法金

殿裏焚香清禁中傳燈遍都邑杖錫遊王公天子揖妙
道羣僚趨下風我法本無著時來出林壑因心得化城隨
病皆與藥上啓黃屋心下除蒼生縛一從入君門說法
無朝昏帝作轉輪主師為持戒尊軒風灑甘露佛雨生
慈根但有滅度理而生開濟恩復聞江海曲好殺成風
俗帝曰我上人為除羶腥欲是日發西秦東南至蘄春
風將衡挂接地與吳楚隣舊少清信士實多漁獵人一
聞吾師至捨網江湖濱作禮懺前惡潔誠期後因因成

日既久事濟身不守更出淮楚間復來荆河口荆河馬
卿岑茲地近道林入講烏常狎坐禪默不侵都非緣未
盡曾是教所任故我一來事永承微妙音竹房見衣鉢
松宇清身心早悔業至淺晚成計可尋善哉遠公義清
淨如黃金

遊天竺寺

晨登天竺山山殿朝陽曉厓泉爭噴薄江岫相縈繞直
上孤頂高平看衆峰小南州十二月地暖冰雪少青翠

滿寒山藤蘿覆冬沼花龕瀑布側青壁石林杪鳴鐘集
人天施飯聚猿鳥洗意歸清淨澄心悟空了始知世上
人萬物一何擾

入若耶溪

輕舟去何疾已到雲林境起坐雲鳥間動搖山水影巖
中響自答谿裏言彌靜事事令人幽停撓向餘景

雜詩

可憐青銅鏡掛在白玉堂玉堂有美女嬌弄明月光羅

袖拂金鵲綵屏點紅妝妝罷含情坐春風桃李香

結定襄郡獄效陶體

我在河東時使往定襄里定襄諸小兒爭訟紛城市長
老莫敢言太守不能理謗書盈几案文墨相填委牽引
肆中翁追呼田家子我來折此獄師聽辨疑似小大必
以情未嘗施鞭箠是時三月暮遍野農桑起里巷鳴春
鳩田園引流水此鄉多雜俗戎夏殊音旨顧問邊塞人
勞情曷云已

長安道

長安甲第多入雲誰言居住霍將軍日晚朝迴擁賓從
路傍揖拜何紛紛莫言炙手手可熱須臾火盡灰亦滅
莫言貧賤即可欺人生富貴自有時一朝天子賜顏色
世上悠悠應始知

行路難

君不見建章宮中金明枝萬萬長條拂地垂二月三月
花如霰九重幽深君不見豔彩朝含四寶宮香風旦入

朝雲殿漢家宮女春未闌愛此芳香朝暮看看來看去
心不忘攀折將安鏡臺上雙雙素手剪不成兩兩紅妝
笑相向建章昨夜起春風一花飛落長信宮長信麗人
見花泣憶此珍樹何嗟及我昔初在昭陽時朝攀暮折
登玉墀只言歲歲長相對不悟今朝遙相思

孟門行

黃雀銜黃花翩翩傍簷隙本擬報君恩如何反彈射金
罍美酒滿座春平原愛才多衆賓滿堂盡是忠義士何

意得有讒諛人諛言反覆那可道能令君心不自保北
園新栽桃李枝根株未固何轉移成陰結實君自取若
問傍人那得知

渭城少年行

洛陽三月梨花飛秦地行人春憶歸揚鞭走馬城南陌
朝逢驛使秦川客驛使前日發章臺傳道長安春早來
棠梨宮中燕初至葡萄館裏花正開念此使人歸更早
三月便達長安道長安道上春可憐搖風蕩日曲江邊

萬戶樓臺臨渭水五陵花柳滿秦川秦川寒食盛繁華
遊子春來不見家鬪雞下社塵初合走馬章臺日半斜
章臺帝城稱貴里青樓日晚歌鐘起貴里豪家白馬驕
五陵年少不相饒雙雙挾彈來金市兩兩鳴鞭上渭橋
渭城橋頭酒新熟金鞍白馬誰家宿可憐錦瑟箏琵琶
玉壺清酒就倡家小婦春來不解羞嬌歌一曲揚柳花

盧姬篇

盧姬少小魏王家綠鬢紅唇桃李花魏王綺樓十二重

水晶簾箔繡芙蓉白玉欄杆金作柱樓上朝朝學歌舞
前堂後堂羅袖人南窓北窓花發春翠幌珠簾鬪絲管
一彈一奏雲欲斷君王日晚下朝歸鳴環佩玉生光輝
人生今日得嬌貴誰道盧姬身細微

江畔老人愁

江南年少十八九乘舟欲渡青谿口青谿口邊一老翁
鬢眉皓白已衰朽自言家代仕梁陳垂朱拖紫三十人
兩朝出將復入相五世疊鼓乘朱輪父兄三葉皆尚主

子女四代為妃嬪南山賜田接御苑北宮甲第連紫宸
直言榮華未休歇不覺山崩海竭兵戈亂入建康城
煙火連燒未央闕衣冠士子陷鋒刃良將名臣盡埋沒
山川改易失市朝衢路縱橫填白骨老人此時尚少年
脫身走得投海邊罷兵歲餘未敢出去鄉三載方來旋
蓬蒿忘却五城宅草木不識青谿田雖然得歸到鄉土
零丁貧賤長辛苦采樵屢入歷陽山刈稻常過新林浦
少年欲知老人歲豈知今年一百五君今少壯我已衰

我昔少年君不睹人生貴賤各有時莫見羸老相輕欺
感君相問為君說說罷不覺令人悲

邯鄲宮人怨

邯鄲陌上三月春暮行逢見一婦人自言鄉里本燕趙
少小隨家西入秦母兄憐愛無儔侶五歲名為阿嬌女
七歲丰茸好顏色八歲黠惠能言語十三兄弟教詩書
十五青樓學歌舞我家青樓臨道傍紗窓綺幔暗聞香
日暮笙歌君住馬春日妝梳妾斷腸不用城南使君壻

本求三十侍中郎何知漢帝好容色玉輦攜登歸建章
建章宮殿不知數萬戶千門深且長百堵塗椒接青瑣
九華閣道連洞房水晶簾箔雲母扇琉璃窓牖玳瑁牀
歲歲年年奉歡宴嬌貴榮華誰不羨恩情莫比陳皇后
寵愛全勝趙飛燕瑤房侍寢世莫知金屋更衣人不見
誰言一朝復一日君王棄世市朝變宮車出葬茂陵田
賤妾獨留長信殿一朝太子升至尊宮中人事如掌翻
同時侍女見讒毀後來新人莫敢言兄弟印綬皆被奪

昔年賞賜不復存，一旦放歸舊鄉里。
乘車垂淚還入門，父母愍我曾富貴。
嫁與西舍金王孫，念此翻覆復何道。
百年盛衰誰能保，憶昨尚如春日花。
悲今已作秋時草，少年去去莫停鞭。
人生萬事由上天，非我今日獨如此。
古今歇薄皆共然。

川上女

川上女，晚妝鮮。日落青渚，試輕楫。
汀長花滿，正迴船暮。來浪起，風轉緊。
自言此去橫塘近，綠江無伴，夜獨行。
獨

行心緒愁無盡

鴈門胡人歌

高山代郡東接燕鴈門胡人家近邊
解放胡鷹逐塞鳥能將代馬獵秋田
山頭野火寒多燒雨裏孤峰濕作煙
聞道遼西無鬪戰時時醉向酒家眠

代閨人答輕薄少年

妾家近隔鳳凰池粉壁紗窓楊柳垂
本期漢代金吾壻誤嫁長安遊俠兒
兒家夫壻多輕薄借客探丸重然諾

平明挾彈入新豐日晚揮鞭出長樂青絲白馬冶遊園
能使行人駐馬看自矜陌上繁華盛不念閨中花鳥闌
花間陌上春將晚走馬鬪雞猶未返三時出望無消息
一去那知行近遠桃李花開覆井欄朱樓落日捲簾看
愁來欲奏相思曲抱得秦箏不忍彈

七夕

長安城中月如練家家此夜持針線仙裙玉佩空自知
天上人間不相見長信深陰夜轉幽瑤階金閣數螢流

班姬此夕愁無限河漢三更看斗牛

長門怨

君王寵初歇棄妾長門宮紫殿青苔滿高樓明月空
夜愁生枕席春意罷簾櫳泣盡無人問容華落鏡中

王家少婦

十五嫁王昌盈盈入畫堂自矜年最少復倚壻為郎舞
愛前溪綠歌憐子夜長閒來鬪百草度日不成妝

岐王席觀妓

金史紀原卷三十九
二月春來半宮中日漸長柳垂金屋煖花發玉樓香拂
匣先臨鏡調笙更炙簧還將歌舞態只擬奉君王

上巳

巳日帝城春傾都被禊晨停車須傍水奏樂要驚塵弱
柳障行騎浮橋擁看人猶言日尚早更向九龍津

贈梁州張都督

聞君為漢將虜騎罷南侵出塞清沙漠還家拜羽林風
霜臣節苦歲月主恩深為語西河使知余報國心

寄盧八象

客從巴水渡，傳爾泝行舟。
是日風波霽，高唐雨半收。
青山滿蜀道，綠水向荊州。
不作書相問，誰能慰別愁。

題潼關樓

客行逢雨霽，歇馬上津樓。
山勢雄三輔，關門扼九州。
川從陝路去，河遠華陰流。
向晚登臨處，風煙萬里愁。

題沈隱侯八詠樓

梁日東陽守，為樓望越中。
綠窓明月在，青史古人空。
江

靜聞山狹川長數塞鴻登臨白雲晚流恨此遺風

晚入汴水

昨晚南行楚今朝北汴河客愁能幾日鄉路漸無多晴
景搖津樹春風起棹歌長淮亦已盡寧復畏潮波

發錦沙村

北上途未半南行歲已闌孤舟下建德江水入新安海
近山常雨谿深地早寒行行泊不可須及子陵灘

送單于裴都護赴西河

征馬出翩翩城秋月正圓
單于莫近塞都護欲臨邊
漢驛通煙火胡沙泛井泉
功成須獻捷未必去經年

黃鶴樓

昔人已乘白雲去此地空餘黃鶴樓
黃鶴一去不復返白雲千載空悠悠
晴川歷歷漢陽樹春草萋萋鸚鵡洲
日暮鄉關何處是煙波江上使人愁

行經華陰

岩崑太華俯咸京天外三峯削不成
武帝祠前雲欲散

仙人掌上雨初晴
河山北枕秦關險
驛樹西連漢時平
借問路傍名利客
無如此處學長生

相逢行

妾年初二八家住洛橋頭
玉戶臨馳道朱門近御溝
使君何暇問夫壻大長秋
女弟新承寵諸兄近拜侯
春生百子殿花發五城樓
出入千門裏年年樂未休

遼西作

燕郊芳歲晚殘雪凍邊城
四月青草合遼陽春水生
胡

人正牧馬漢將日徵兵露重寶刀濕沙虛金鼓鳴寒衣
著已盡春服與誰成寄語洛陽使為傳邊塞情

奉和許給事夜直簡諸公

西掖黃樞近東曹紫禁連地因才子拜人用省郎遷夜
直千門靜河明萬象懸建章宵漏急閭闔曉鐘傳寵列
貂蟬位恩深侍從年九重初起草五夜即成篇顧已無
官次循涯但自憐遠陪蘭署作空此仰神仙

舟行入剡

鳴棹下東陽回舟入剡鄉青山行不盡綠水去何長地
氣秋仍濕江風晚漸涼山梅猶作雨谿橋未知霜謝客
文逾盛林公未可忘多慙越中好流恨閱時芳

長干曲四首

君家何處住妾住在橫塘停船暫借問或恐是同鄉
家臨九江水來去九江側同是長干人生小不相識
下渚多風浪蓮舟漸覺稀那能不相待獨自逆潮歸
三江潮水急五湖風浪涌由來花性輕莫畏蓮舟重

維揚送友還蘇州

長安南下幾程途
得到邗溝弔綠蕪
渚畔鱸魚舟上釣
羨君歸老向東吳

常建

春詞三首

苑苑黃柳絲濛濛
雜花垂日高紅妝
卧倚對春光遲寧
知傍淇水腰裏黃金羈

翳翳陌上桑南枝
交北堂美人金梯出
素手自提筐非

但為蠶飢盈盈嬌路傍

階下草猶短牆頭梨花白織女高樓上停梭顧行客問
君在何所青鳥舒錦翮

塞上曲

翩翩雲中使來問太原卒百戰苦不歸刀頭忽明月塞
雲隨陣落寒日傍城沒城下有寡妻哀哀哭枯骨

古意四首

牧馬古道傍道傍多古墓蕭條愁殺人蟬鳴白楊樹回

頭望京邑合沓生塵霧富貴安可常歸來保貞素

二妃方訪舜萬里南方懸遠道隔江漢孤舟無歲年不
知蒼梧處氣盡呼青天愁淚變楚竹蛾眉喪湘川後人
立為廟累世稱其賢過客設祠祭狐狸來坐邊懷古未
忍還猿吟徹空山

明月照高閣綵女褰羅幕歌舞臨碧雲簫聲沸珠箔青
鸞臨南海天上雙白鶴萬里齊翼飛意求君門樂玉霄
九重閉金鎖夜不開兩翅自無力愁鳴雲外來態深入

空貴世屈無良媒
俛仰顧中禁東飛
白玉臺

楚王竟何去
獨自留巫山
偏使世人見
迢迢江漢間
駐舟春谿裏
皆願拜靈顏
寤寐見神女
金紗鳴珮環
閒艷絕世姿
令人氣力微
含笑竟不語
化作朝雲飛

古興

漢上逢老翁
江口為僵屍
白髮沾黃泥
遺骸集烏鴉
機巧自此忘
精魄今何之
風吹釣竿折
魚躍安能施
白水明汀洲
菰蒲冒深陂
唯留扁舟影
繫在長江湄
突兀枯

松枝悠揚女蘿絲託身難憑依生死焉相知徧觀今時
人舉世皆爾為

客有自燕而歸哀其老而贈之

羸馬朝自燕一身為二連憶親拜孤塚移葬雙陵前幽
願從此畢劍心因獲全孟冬寒氣盛撫轡告言旋碣石
海北門餘寇惟朝鮮離離一寒騎孑孑馳白天生別皆
自處況為士卒先寸心漁陽興落日旌竿懸

白龍窟汎舟寄天台學道者

夕映翠山深餘暉在龍窟扁舟滄浪意淡淡花影沒西
浮入天色南望對雲闕因憶莓苔峯初陽濯玄髮泉蘿
兩幽映松鶴間清越碧海瑩子神玉膏澤人骨忽然為
枯木微興遂如兀應寂中有天明心外無物環迴從所
汎夜靜猶不歇澹然意無限身與波上月

送李十一尉臨谿

泠泠花下琴君唱渡江吟天際一帆影預懸離別心以
言神仙尉因致瑤華音回軫撫商調越谿澄碧林

宿王昌齡隱居

清谿深不測，隱處惟孤雲。
松際露微月，清光猶為君。
茅亭宿花影，藥院滋苔紋。
余亦謝時去，西山鸞鶴羣。

白湖寺後谿宿雲門

落日山水清，亂流鳴淙淙。
舊蒲雨抽節，新花水對窓。
谿中日已沒，歸鳥多為雙。
杉松引直路，出谷臨前湖。
洲渚晚色靜，又觀花與蒲。
入谿復登嶺，草淺寒流速。
圓月明高峯，春山因獨宿。
松陰澄初夜，曙色分遠目。
日出城南

隅青青媚川陸亂花覆東郭碧氣銷長林四郊一清影
千里歸寸心前瞻王程促却戀雲門深畢景有餘興到
家彈玉琴

閒齋卧雨行藥至山館稍次湖亭二首

旬時結陰霖簾外初白日齋目清病客心魂畏虛室閒
梅照前戶明鏡悲舊質同袍四五人何不來問疾
行藥至石壁東風變萌芽主人山門綠小隱湖中花時
物堪獨往春帆宜別家辭君向滄海爛熳從天涯

仙谷過毛女意知是秦宮人

谿口水石淺泠泠明藥叢入谿雙峰峻松栝踈幽風垂
嶺枝嫋嫋翳泉花濛濛蜃緣霽人目路盡心彌通盤石
橫陽崖前臨殊未窮回潭清雲影瀾漫長天空水邊一
神女千歲為玉童羽毛經漢代珠翠逃秦宮目覩神已
寓鶴飛言未終祈君青雲秘願謁黃仙翁嘗以耕玉田
龍鳴西頂中金梯與天接幾日來相逢

夢太白西峯

夢寐升九崖杳靄逢元君遺我太白峯寥寥辭垢氛結
宇在星漢宴林閉氤氳檐楹覆餘翠巾鳥生片雲時往
谿谷間孤亭晝仍曛松峰引天影石瀨清霞文恬目緩
舟趣霽心投鳥羣春風又搖擢潭島花紛紛

鄂渚招王昌齡張儋

刈蘆曠野中沙上飛黃雲天晦無精光茫茫悲遠君楚
山隔湘水湖畔落日曛春鴈又北飛音書固難聞謫居
未為嘆讒枉何由分午日逐蛟龍宜為弔寃文翻覆古

共然名宦安足云貧士任枯槁捕魚清江漬有時荷鋤
犁曠野自耕耘不然春山隱谿澗何氤氲山鹿自有場
賢達亦顧羣二賢歸去來世上徒紛紛

晦日馬銜曲稍次中流作

夜寒宿蘆葦曉色明西林初日在川上便澄遊子心晴
天無纖翳郊野浮春陰波靜隨釣魚舟小綠水深出浦
見千里曠然詣遠尋扣船應漁父同唱滄浪吟

宿五度谿仙人得道處

五度谿上花生根依兩崖二月尋片雲願宿秦人家上
見懸崖崩下見白水湍仙人彈碁處石上青蘿盤無處
求玉童翳翳惟林巒前谿遇新月聊取玉琴彈

西山

一身為輕舟落日西山際常隨去帆影遠接長天勢物
象歸餘清林巒分夕麗亭亭碧流暗日入孤霞繼渚日
遠陰映湖雲尚明霽林昏楚色來岍遠荆門閉至夜轉
清迥蕭蕭北風厲沙邊鴈鷺泊宿處蒹葭蔽圓月逗前

浦孤琴又搖曳冷然夜遂深白露霑人袂

第三峰

西山第三頂茅宇依雙松杳杳欲至天雲梯昇幾重瑩
魄澄玉虛以求鸞鶴蹤逶迤非天人執節乘赤龍旁映
白日光縹緲輕霞容孤輝上煙霧餘影明心胸山暝學
棲鳥月來隨暗蒼尋空靜餘響嫋嫋雲谿鐘

張天師草堂

靈谿宴清宇傍倚枯松根花藥繞方丈瀑泉飛至門四

氣閉炎熱兩崖改明昏夜深月暫皎亭午朝始暎信是
天人居幽幽寂無喧萬壑應鳴磬諸峯接一魂忽而舉
霄漢寥落空南軒

漁浦

春至百草綠陂澤聞鷓鷯別家投釣翁今世滄浪情漚
紆為緼袍折麻為長纓榮譽失本真怪人浮此生碧水
月自濶安流淨而平扁舟與天際獨往誰能名

空靈山應田叟

湖南無村落山舍多黃茅淳朴如太古其人居鳥巢牧
童唱巴歌野老亦獻嘲泊舟問谿口言語皆啞咬土俗
不尚農豈暇論肥瘠莫佞射禽獸浮客烹魚鮫余亦罟
罟人獲麋今尚苞敬君中國來願以充其庖日入聞虎
鬪空山滿咆哮懷人雖共安異域終難交白水可洗心
采薇可為肴拽策背落日江風鳴稍稍

昭君墓

漢宮豈不死異域傷獨沒萬里馱黃金蛾眉為枯骨迴

車夜出塞立馬皆不發共恨丹青人墳上哭明月

弔王將軍墓

嫖姚北伐時深入疆千里戰餘落日黃軍敗鼓聲死嘗
聞漢飛將可奪單于壘今與山鬼鄰殘兵哭遼水

古意

井底玉冰洞地明琥珀轆轤青絲索仙人騎鳳披彩霞
挽上銀瓶照天閣黃金作身雙飛龍口銜明月噴芙蓉
一時渡海望不見曉上青樓十二重

張公子行

日出乘釣舟，嫋嫋持釣竿。
涉淇傍荷花，馳馬間金鞍。
俠客向雲中，腰間懸轆轤。
出門事嫖姚，為君西擊胡。
胡兵漢騎相馳逐，轉戰孤軍海西曲。
百尺旌竿沈黑雲，邊笳落日不堪聞。

聽琴秋夜贈寇尊師

琴當秋夜聽，況是洞中人。
一指指應法，一聲聲爽神。
寒蟲臨砌默，清吹裊燈頻。
何必鍾期耳，高閒自可親。

送李大都護

單于雖不戰，都護事邊深。
君執幕中祕，能為高士心。
海頭近，初月磧裏多愁陰。
西望郭猶子，將分淚滿襟。

潭州留別

賢達不相識，偶然交已深。
宿帆謁郡佐，悵別依禪林。
湘水流入海，楚雲千里心。
望君杉松夜，山月清猿吟。

題破山寺後院

清晨入古寺，初日照高林。
竹徑通幽處，禪房花木深。

光悅鳥性潭影空人心萬籟此俱寂但餘鐘磬音

江行

平湖四無際此夜泛孤舟明月異方意吳歌令客愁鄉園碧雲外兄弟淥江頭萬里無歸信傷心看斗牛

讌居

青苔常滿路流水復入林遠與市朝隔日聞雞犬深寥寥丘中想渺渺湖上心嘯傲轉無欲不知成陸沈

塞下曲

玉帛朝回望帝鄉
烏孫歸去不稱王
天涯靜處無征戰
兵氣銷為日月光

因嫁單于怨在邊
峨眉萬古葬胡天
漢家此去三千里
青塚常無草木煙

送宇文六


花映垂楊漢水清
微風林裏一枝輕
即今江北還如此
愁殺江南離別情

嶺猿

裊裊淒淒清且切
鷓鴣飛處又斜陽
相思嶺上相思淚
不到三聲合斷腸

三日尋李九莊

雨歇揚林東渡頭
永和三日盪輕舟
故人家在桃花岬
直到門前谿水流



石倉歷代詩選卷三十九